

## Geduld bringt Rose.....

Es Telefon hat geklingelt un e freindlich Weibsstimm lad uns in, in e Restaurant zu kumme, dorte were Unerbetter un allerhand Bettzeich präsentiert. Anschliessend krien alli Anwesende e Nachtessse gspendiert. Weil mer sowieso im Sinn han, uns neiji Unerbetter zu kaafe sin mer hingang. Des Restaurant war gstuppte voll (jetz weeß ich nit genau, weger de Unerbetter oder wegerm Nachtessse!). Pinktlich han zwaa jungi Leit anfang zu rede, wie e Wasserfall. Alles was se angebot han, war aus purer Schofwoll: Matratze, Kisse un natierlich die Unerbetter.

Noh zwaa Stunde han ich schun Koppweh ghat. Alles scheen un gut, doch is noch ke Wort gsaat gin, was des alles koschte tät. Die Leit sin ungeduldich gin, wahrscheinlich ware se aa schun hungrich, es war inzwische bal zehn Uhr owets. Endlich han die zwaa sich herabgeloss, iwer die Preise zu rede. Ich han mei Mann schief anschaut, der hat mich unerm Tisch gstuppt un zu verstehn gin: kumm, mer haue ab! Weil for so zwaa Unerbetter han die jo 30 Millione verlangt.

Mir han uns um halwer elfi dann a zammgephackt un sin je hem gfuscht. Mied un hungrich han mer uns in unser aldi Unerbetter verkroch un vorghol: eemol un nie wieder losse mer uns vernarre!

Un kaum ware e phaar Täch vergang, seider ich mich mit dene Unerbetter geärchert han, un schun klingelt wieder es Telefon. E Freindin hat mich ingelad, for mitgehn zu eener Präsentation vun Phanne un Tippe. Ich han mer was gekrumelt un han gsaat, dass ich leider ke Zeit han.

Am Tach dernoh ruft die Freindin wieder an, for verzähle, was es dorte erlebt hat. Des Ganzi hat aa e ganze Owet lang anghal, allerhand Gscherr is vorgfiehrt gin. Doch eene Tippe, der soll wirklich Wunner zuwech bringe. Ich hans jo nit miterlebt, ich kann nor schreiwe, was mei Freindin mer vorgschwärmt hat. Also mer kann zum Beispiel Fleisch drin brode. Des kummt scheen in de Tippe, der git zugedeckt un ritsch-ratsch is es Bradl fertich. Ohne Eel un ohne Salz, nor phaar Troppe Wasser kumme dran. Trotzdem soll der Bradl sehr schmackhaft un gesund sin.

Wie die Red druf kumm is, was dann so e Ding koschte soll, hat die Freindin anfang zu stottre un hat was vun 500 Euro gephischpert. Erscht han ich gement, ich heer nit gut. Doch des Weib hat fescht behaupt, der Tippe is a sovill wert, schun weger der Gsundheit. Noh dem Gspräch han ich hin un her iwerleet: also Eel brauch mer kens kaafe un a ke Salz. Die Rechnung is mer trotzdem nit zammgang. Grad wann ich in Gedanke zammgerechent han, was do alles ingspart git!